



余聞之詩以言志又曰詩以道性情是知夫詩也者心
之聲也抒寫懷抱流連景光即感慨悲歌亦不失風人
之遺旨三唐居右職者可傳之詩甚少少達而多窮不
洵然哉無已名公子未弱冠即爲壇坫主盟雖老生宿
儒無不願爲扶輪擁篲者顧其詩多抑鬱悲涼之致人
或以無病呻吟目之有鉅公題無已詩曰詩如三峽猿
啼九秋蟲響少年貴介時而怨老嗟卑淺渚芳洲乃如
瞿塘灩澦乎是烏知我無已者無已於古今之詩無所
不讀亦無所不學其旨溫以厚其音和以雅其辭麗以
則其意清以真汗漫出游過都歷塊凡田家疾苦吏治
清濁與夫天時之雨暘風土之厚薄感切諷諭憂憫時

艱一篇之中三致意焉豈徒以詩自鳴其不平者哉他如美人香草偶爲溫柔旖旎之言自附理學門庭者往往反唇騰謗然緣情綺靡實不接於風流國風好色而不淫小雅怨悱而不怒其爲可傳於後無疑也辛丑夏失意南還僑寓當湖去余所居頗近其性好使酒罵座今遂斷飲覆觴矣每於稠人廣衆中遇所不欲見之人遇所不樂聞之事竟如未嘗見未嘗聞者豪放如無已而作無所可否之人其志誠足悲已江鄉羈旅集二卷可以兄事青丘弟畜蒙叟以空囊如葉不能開雕余急呼梓人爲之鐫刻以公諸同好者雍正元年人日蘿軒老人翁嵩年題時年七十又七

昌黎之論文以氣爲主其言曰氣盛則言之長短與聲之高下皆宜詩亦猶是也才情所以昌吾氣非是則餒學問所以斂吾氣非是則浮必也芳潤淪浹于心脾英華含咀于輔頰稽之旣富而氣之盛足以驅役左右之由是發而爲詩如鷲鳥凌空而迅擊如駿馬下阪而疾馳如潮之溢乎四海返而歸墟略無留滯沮闕然後詩之能事畢矣錢唐汪君無已爲名父之子少負異才年踰四十舉京兆秋試三上南宮未第飄然南歸僦居東湖之上益肆力于詩自辛丑秋迄壬寅冬所得凡四百七十餘首題曰江鄉羈旅集以書來屬序憶初識無已于京師年方盛壯酒酣以往興會颺舉談論峭拔率嘗

屈其坐人其氣殆不可一世別去十六七年重晤于翁
蘿軒席上則飲不盡器其意退然其言呐然其氣溫然
圭角崖窾悉消歸何有余心竊異之今讀其詩感時以
寄情隨事以寓諷正而不腐奇而不生澹而不枯工而
不靡非有得于涵養之深詎易臻此吳草廬有云詩乃
乾坤清氣所成不洵然歟噫以無己之才高步名場垂
三十年所與游綦廣矣不知者或曰其氣傲其近似者
則曰其氣豪要非深知無己者也吾之知無己于其人
亦于其詩知其向之汪洋自恣者所以昌其氣則知今
之欲然自視者乃所以斂其氣也斂之至而氣益以昌
夫是以言之長短與聲之高下皆宜宜其詩之無體不

工也因書綴數語而歸其編海寧查慎行序

託倦鳥於淵明還非無所笑歌魚之馮煖歸亦安之維
彼才人好爲異客豈緣貧士慣自輕家乾坤那有窮途
哭迴不必宇宙雖多滑路躓倒何曾然而瞻在四方生
成有志務還一步遠近同心旣不能附鳳攀龍飛騰天
上又不似倦龜受蛤擺脫人間名利奚爭得毋蟲臂鼠
肝之細夢魂難越何至烏頭馬角之嫌方逆旅以言旋
忽近鄉而情怯江鄉羈旅吾無解焉玉岑丰神磊落意
氣激昂德以鳳衰久溷諸生之籍文於豹變纔登舉子
之科再上南宮定空北冀而依然秋賦又值冬烘投人
則白璧何光作客而黃金已盡嗟乎嫫如銜嫁鳩將令
以爲媒奴不愛才馬亦難於戀主際無可奈何之會當

末之也已之時楊子多岐猶然有路少陵言別乃至無
家一生繞樹遊絲萬事沾泥敗絮嗟乎鳳沼尋常望三
山其渺渺虎林咫尺隔一水以盈盈故壘營巢應作銜
泥之燕當湖儼舍且留踏雪之鴻乍聘小星爲藏金屋
常來舊雨共眺珠樓矧到處而逢迎即出遊兮爛熳刻
羽而成險韻揮毫以和新聲瑣語調言竝工唐律高談
雄辯絕少吳吟猥貽草藁之緘彌高春雪似薄蓴羹之
味任起秋風縱豪氣之未除詎遊情之獨暢江鄉羈旅
吾無解焉意者尋師莫返曾斷織於樂羊不然過汝致
詞等題橋之司馬康熙再壬寅重九同學世弟章藻功
序

讀書堂詩藁

辛丑年七月起十二月止



江鄉羈旅集

卷一

錢唐 汪 日祺 玉岑

七月一日至蘿軒先生山莊和東坡七月一日
出城舟中苦熱韻

暑氣蒸孤蓬煩懣欲裸體久旱湖水枯不見波渺瀰打
槳驚鷺鷗舉網躍魴鱧捉塵揮埃氛濯足弄清泚被面
復霑裳橫流汗如洗到岸聞人聲花間雙扉啓

蘿軒先生留飲和東坡司馬君實獨樂園韻

先生我父行久別拜牀下起行奉杖隨名勝開綠野飭
廚具盤殮拭几傾杯斝山林遠市囂淳古似虞夏後進

賴陶鈞老成主風雅此邦惜無人未結耆英社賤子念
平生頽放亦豪者性不合時宜年來和彌寡劍氣夜衝
天當世無歐冶不爲解條鷹空作泛駕馬惟公識焦桐
不以散材捨炎涼驗人情發憤面欲赭俗子憎多言恨
不吞炭啞

和東坡七月五日韻

田家占五行不復言世務流寓自先人重來憶前度衣
潤濃香熏肉美慢火煮鶯雛發清音荇葉抽翠縷冷暖
頗自知肝膽向誰露慎勿如擣菹以身作孤注

北窗迎風眠自謂羲皇上谷口鄭子真南邨陶元亮登
閣紅霞蒸泛舟綠波漲熱客習朝叅賢郎輸邊餉冠裳

結恩讐得失互忻悵惟我澹無營此心曠而放

登弄珠樓

碧闌干外檣輕舟樹色煙光翠欲流鷗鳥能閒魚亦樂
笛聲何處夕陽樓

鳴榔夜火出漁舟孤塔亭亭倒影流風露漸涼人未醉
一湖明月弄珠樓

子夜四時歌

春

情盡橋邊柳傷離鎖翠眉春風吹欲斷顛顛不成絲

夏

送別曉露零田田荷葉翠不是荷上珠是儂眼中淚

秋

郎采芙蓉花妾采芙蓉葉花葉兩處分不知幾時接

冬

雪片漫空舞隨風四處飄愁心不可展一似雪中蕉

得錢唐友人書賦此奉答

故人折簡招看花芙蓉豔豔蒸紅霞中間語氣頗相誚
客子胡不思還家承君厚意遠相約開函不覺增大噓
舉杯便可斗酒傾何必更向花前酌榜舟鞭馬心憧憧
蕭然行李征塵封上苑有花不得采采花釀蜜多遊蜂
我見人人說花好我道人人被花惱花下何曾盡少年
一回對花一回老年年花落還重開朱顏已去安能來

馥郁芳菲逞妖冶彭殤舜跖皆塵埃人羨花叢紅似血
花笑人頭白如雪若是逢花便解愁愁人看花更愁絕
我聞舊屋生蓬蒿瓦礫堆積山丘高書聲琴韻久絕響
其中時有豺狼嗥荒蕪三徑難回首不夢錢唐君解否
東湖煙月勝西湖何況名花此間有

瘧

舟車歷七旬身勞懷抱惡到此不數朝其疾乃大作遂
來病君子所以名爲瘧寒暑互紛爭陰陽相擊搏不得
快展舒安能和經絡有時冷如水僵凍眠洛澤有時熱
如湯煩躁沸鼎鑊此心苦漂搖茫茫如浪泊此身苦拘
牽急急如繩縛眼昏過煙雲耳震聞鞞鐸狂欲奮臂呼

憤思拔劍斫神情每張皇言語多舛錯拭巾汗淋漓對
鏡形骸削晝夜徒呻吟不曾飲水勺自問無用人何妨
填溝壑生寄死是歸不足資一噓醫無盧扁良投我以
涼藥脉理猶未深豈知余體弱五日藥無驗精神愈蕭
索急檢所定方視之大驚愕佐使不分明攻補未斟酌
譬彼赤貧家更復遭虜掠譬彼凶年民那可受殘虐素
習岐黃書藥性頗領略以意服葠苓漸能進精鑿人葠
似黃金其奈又垂橐揚鬢海上魚振翮雲中鶴隨其意
所之世界亦極樂煩惱混塵緣我殊不踴躍天路最崎
嶇儒門甚淡薄一衲復一瓢閒身可行脚茲願不難償
且俟病體霍

辛丑七夕

迢遞佳期病思催樓西涼月影徘徊秋瓜夏果空陳案
玉露金風懶上臺鵲渚填橋情宛轉蛛絲結網意驚猜
夢中欲泛靈槎去親向天孫乞巧來

病中納姬令其暫卧別榻戲作七絕二首

紅顏白髮一軒渠四角流蘇錦帳虛却笑茂陵人乍至
對牀秋雨病相如
昇天門戶說風情簾下梳頭映水精自愧不如王處仲
閣中還聽佩環聲

驅瘧行

瘧鬼瘧鬼何惡劣我聞爾祖本聖哲亦是顛頊之苗裔

其形傲狠性詭譎堂堂中土不汝容棲託瘴水爲妖孽
一脚跳踉逞其威流毒遍宇心始悅無端使人寒無端
使人熱寒如堅冰凝熱如猛火熱先寒後熱如期來通
身束縛膺縲紲飲食不能轉側難神昏骨弛背欲折五
官四大俱不寧陰陽激薄元氣泄計亦無所施不分巧
與拙力亦無所用不分庸與杰高秋肆焰其勢張妖氛
到處若河決室有患者人遠之紛紛纏染禍頗烈相戒
不敢呼其名呼名毛髮盡灑浙天帝偶醉任汝行汝遂
引類相屯結終南進士有鍾馗牙笏綠袍貌雄桀性喜
殺鬼掀怒髯手中晃晃三尺鐵縱有點鬼善潛藏奉揚
天討遍搜抉屠汝腸瀝汝血追汝魂搗汝穴割汝形骸
截汝唇舌殲汝子孫勦汝儕列桃湯沃汝頭汝不敢陵
蔑葦索縛汝身汝無所奔軼又聞鍾進士飲噉甚饕餮
饑來嚼鬼如芝麻諸鬼縱橫拔劍切骨月破碎齒牙間
使汝灰飛而煙滅或殺或噉頃刻空汝之種類皆斷絕
從此塵寰永晏然人人共樂清秋節

病起書懷

病起形神隔疑如醉後醒從容餐薄粥扶曳出中庭懶
讀閒情賦親書座右銘曉來明鏡裏霜鬢更星星
憶昔輕雲路思爲萬里翔題橋司馬恨罵座灌夫狂揮
灑天人策縱橫翰墨場年華空老大志業轉荒唐
中夜聞雞舞高天擊筑歌腰橫豪客劍手握美人鞞排

悶傾藍尾分曹卷白波雙丸如組織來往不停梭
小隊荒原外權生耳後風呼鷹秋縱轡射虎夜鳴弓武
略邊陲靜王庭朔漠空有懷還未遂誰信丈夫雄

病起

跌坐繩牀亦快哉中虛還怕病魔來乳花霞脚茶頻啜
蠹篋蛛絲卷嬾開靜處房櫳如婦女難調飢飽似童孩
逢人莫話滄桑事惟恐昆明有劫灰
如綿病骨強支撐客至羣驚太瘦生常為多談知氣怯
翻因斷肉得神清口占硬語濡吟筆手錄醫方扇藥鐙
自笑嗔癡非定慧撞胸心事坐愁城

放言五首

春殘杏雨落花催綠暗紅稀失意回束皙文章多嫚戲
蘭成辭賦總悲哀奴嫌門冷逾驕蹇朋為身狂轉忌猜
鐵硯未穿灰未死肯教豪氣便摧頽

袞袞如乘過隙駒精金失色怨洪爐世人但解功名顯
我輩原難禮法拘周處少年雄里巷戴淵羣盜擾萑苻
丈夫自有生平在那肯埋頭學豎儒

咫尺瀛洲路已迷凌風難覓上天梯常譏郭解非豪俠
最愛淳于會滑稽俗子大都殊冷煖故人一半隔雲泥
江湖廊廟何分別讀罷蒙莊悟物齊

求食寧同雞鶩爭從他造物忌虛名小兒應訝陶元亮
先達誰知陸士衡詩酒隨時堪寄託舟車到處少逢迎

紛紛肉眼多皮相懶向人前話不平
漫說知雄與守雌棲鳥不借上林枝出師諸葛真名士
撫枕桓溫是可兒妄想一官鑽故紙苦尋殘劫戰枯棋
絕流斷港無涓滴欲挽江河實漏卮

戲作

翠幙初熏百和香釵橫鈿落倚新妝笑呼小婢傳私語
今夜河魁尚直房
良時花月漸忘懷病隔巫雲夢未諧坐破蒲團聽夜漏
家人竊訝太常齋

謁城隍廟

瘦骨支離病後身階前再拜肅明禋英威赫濯香燈盛

廟貌森嚴俎豆陳百里田疇愁旱魃一方民社恃靈神
願將甘澍甦枯稻救此三時辛苦人

題趙文敏畫馬

神駿騰驤塞草枯錦韉金轡跨胡雛應懷家國無窮恨
不寫中原戰馬圖

夜雨

礎潤燈輝暗涼蟾離畢星連朝雲漠漠一夜雨冥冥蛇
影馳飛雷鼉鳴走怒霆田家相慰藉婦子喜同聽
三月無膏雨於今樂事多海飛驚水母天漏瀉銀河里
社迎神曲康衢擊壤歌西成知有望共食玉山禾

和陶歸田園居五首

少小喜結納安能戀家山風塵徒自苦忽已五十年人
心難測地險如臨深淵舌耕與筆耒破硯非良田文人
相傾軋釁起杯酒間簸揚屬天幸糠粃在吾前米貴居
不易有時廚無煙明鏡不假借蕭蕭漸華顛形勞神亦
瘁頗羨沙鷗閒南還欲息影何用登燕然

四十九年非如今脫塵鞅睡穩夢亦清可以斷妄想蓑
笠煙雨中神情殊勇往私自署頭銜東湖一亭長所欣
地稍偏聞見頗不廣禾黍望繁滋深耕勿鹵莽

日近長安遠貴交尺書稀量晴并課雨忘我游倦歸荷
鋤親履畝欲換田家衣故人勿相誚跡與青雲違

久旱苦車水婦子意不娛三日不斷雨歡聲遍郊墟地

濕無客至寂寥如山居嘉禾鬱以秀土潤甍根株年豐
食可飽朝夕得晏如但望免飢餓敢求有贏餘不然吸
沆瀣豈能充腸虛莞爾指困笑我家儋石無

吾若萬里江千里亦一曲乾坤芥子耳何處容我足阜
白不須辨名場同博局讀書惜分陰賦詩刻寸燭求友
隨小童出門趁朝旭

和東坡新居韻

破除貪嗔癡安穩神形影斗室列琴書自云入佳境閉
門機心忘隱几塵事屏醉擁黃紬眠所欣夜漸永今年
雖也無囊中不脫穎身外復何求百年亦俄頃

沈則三屬題竝頭蓮畫扇

紅玉雙擎映綠沈美人相竝吐柔心臨風似翦同功繭
浴水應來共命禽

陸研濤招同諸君子讌集

征客初回薄板船一時觴詠集羣賢文壇獲落羞名士
酒陣歌呼悔少年閱歷既深多檢束談諧頗暢喜留連
如今但有詩情在欲借山陰九萬牋
數厘幸得比鄰居傾蓋言懽意氣舒縱博佯狂袁彥道
倦游消渴馬相如一寒不肯因人熱萬卷猶能讀父書
流水高山誰領會素心晨夕莫生疎

賦謝研濤招飲和東坡傅堯俞濟源草堂韻

杜門息影忘身世赴飲時過我友廬位置琴書諸事好

平分風月半塵無故人杯勸逡巡酒高士詩成主客圖
共舉溫公真率會不將腐鼠嚇鸚鵡

中秋月寄無亢兄無悔弟和東坡中秋月三首

寄子由韻

我如水上萍漂泊隨西東去年當此夕溷跡長安中兄
弟笑語洽月光入簾櫳西山浮遠翠爽氣橫秋空相攜
坐庭宇小舁載酒從清虛沁靈府疑若廣寒宮枝上驚
宿鳥階前聒鳴蟲豈不惜身瘁豈不悲途窮聚散那可
必佳辰頗難逢遣愁且痛飲談辨何喁喁

蕭蕭班馬鳴攜手河梁別欲發身且留未語氣先咽踪
蹟絮亂飛光陰梭頻擲抱病徒銜悲口中生石闕烈日

江續集卷一
九
逞炎威道旁鮮林樾榆柳充民饑并無一寸葉觸目皆
流離杞憂不可說胠篋亂萑苻空囊亦股栗昆季尚黑
頭惟我鬢堆雪逝將老江鄉永與軟紅絕

東湖好風月耳目爲之清醉來苔磯坐飯罷花田行有
時塵不埽無事門常扃月下漁火影枕邊櫂歌聲逃禪
學臨濟濡毫和淵明可免鷺鳩笑不與鼻鳶并飛觴傾
白墮斂鐸閒青萍經時苦陰雨所喜中秋晴新詩酬令
節殊覺身世輕北望三歎息猶牽別離情

東湖弄珠樓和東坡金山妙高臺韻

呼童掉小舟垂釣學漁子雨後無纖埃出城不數里湖
水何清泠可以洗我耳繞岸野蟲鳴掠波驚鷗起孤塔

逼層霄中流一柱砥登樓苦梯高足軟憑窗几知無濟
勝具已長犬馬齒萬頃搖瑠瓊月光弄煙水豁然悟天
機自喜覺今是勿爲饑火燒谷神可不死

寄無亢兄和東坡初秋寄子由韻

何所聞而來何所見而去花片東西飛弟兄各一處避
跡塵垢外置身丘壑中淵明歸栗里此意將毋同昨夜
夢兄來呼名叩戶牖相見慰離憂欣然握我手惜別忽
已去醒來還自疑匆匆無一語後會未可期羲鞭不肯
停冉冉催人老志士歷苦辛莫嫌髮白早但悲紅日速
難望黃金成欲行行不得怕聽鷓鴣聲

寄衛如弟和東坡戲子由韻

此身未得登蓬丘北胡南越爲同舟頽然自放澹榮利
豈願頸著金籠頭茅簷寧遂輸魏闕草具何必羅嘉羞
俊人不可禮法拘大抵諧謔如俳優燒盡詩書棄儒服
青鞵布襪名山遊吾弟兢兢守紀律埋頭佔畢習經術
銜泥辛苦燕茸巢採花經營蜂釀蜜丈夫何處不伸眉
齷齪翻爲尺蠖屈鑽他故紙何勞勞素有大志持旌旄
失意不欲向人說閒居竊歎空牢騷老大無成頗自恥
猶走緇塵杖馬箠議論侃侃世共憎平生不解阿與唯
浮沈俯仰非所能畏首畏尾身餘幾凡骨妄欲登鵬程
安能竹帛垂功名公車夢斷與子約吾視一第浮雲輕

寄無悔弟和東坡寄子由韻

翰林先生風月永傑直俯視花磚影託身未有祇陀園
所少黃金八十頃春花秋月不得閒玉署冰銜奉朝請
高堂雙壽甘旨供待漏鳴珂入祕省畫意瀟灑藝名香
琴韻和平啜新茗上有堯舜下巢由爾掌絲綸我箕頴

示芝兒和陶責子

力學爲通人當思名副實但憎彥國狂未得延之筆尺
寸累一絲機杼成丈匹帖括何足言吾儒重經術棘闈
奔競人儉腹十六七論古心茫然見之頗寒栗我常自
教兒所望爲博物

作家書寄無亢兄和東坡走筆寄子由五首韻

伸紙作家書緘愁先哽咽愧我一身勞與兄半年別卧

病骨支離傷時情鬱結局促不展舒糊塗寡施設琴絃
難更張俎肉任膾截逸興尚橫飛狂言時妄發欲觸不
周山一怒地維絕

少年氣豪放失足陷軟紅目可空一世舌應輕三公心
麤謀更拙齒豁頭將童歌曲惜寡和作詩喜留窮不解
問龜筮何由辨吉凶吾自明吾道奈何計其功

吾兄尚需次蕭散居 神京不能脂韋絜寧作蓬累行

秋風子荆怨遺挂安仁情八法工鐵畫五言專長城阮

廚酒滿屋鄴架書連甍文成試擲地應作金石聲

非不愛熱官思之已爛熟屢見槐花黃未染柳汁綠得
失何重輕雨雲頗翻覆陸地不生蓮屠門空嚼肉新貴

多寒盟故交誰推轂自能洩所疑勿問詹尹卜

杭州非人居南還哭岐路此縣遠塵囂有田收黍稌求
仙石成金供佛茶化乳局分黑白棋酒別大小戶夜燈
聞書聲春雨出耕具花圃發暗香釣舟鳴柔櫓霜露展
松楸我非忘墳墓

和陶形影神

形贈影

喜怒哀樂怨一日十二時乾坤雖云大惘惘將焉之自
少以至老勞瘁常如茲疾病不能却奔走無窮期官骸
奄忽棄親友誰追思生平所愛戀垂涕空漣沔惟爾不
隔閼相附無所疑彷彿爾舉爵痛飲不可辭

影答形

動靜皆由人無巧亦無拙自知託虛無不忍與君絕夢
幻泡露電與吾俱禪悅體倦入睡鄉君欲偶相別夜深
息燈輝吾亦暫時滅不似世情澆周旋異冷熱五臟屬
五行五行迭相竭爲善樂何如勿戀酒味劣

神釋

浮生若夢中其理本昭著應酬苦紛紜恩怨多變故如
君不異趨旦夕恒相附何事費言詮傾耳聽我語人爲
萬物靈大率有來處過客傳舍中暫借閣浮住彭殤亦
何殊生死不知數人我是非中冠裳總戲具烈士苦徇
名立善徒邀譽惟酒可忘憂難遣酒魔去上與造物游

無喜更無懼形化影亦消勿爲百年慮

代淵明答東坡和東坡問淵明韻

人下有九地人上有九天三才俱法道道又法自然日
星雖燦列遇劫難高懸萬物盡灰墨寧留山與川三皇
爲異物而況三皇前百歲已上壽誰如彭祖年養生杯
中物顏色常芳妍所望秫田熟不望飲醴泉人中有善
者若香得龍涎傷生昔賢戒委運憑推遷縱浪天地外
大化何由纏應盡不知盡我爲愚者言

八月二十日招同人小飲和東坡月夜與客飲

酒韻

有脚不蹋京華春此中日夕多高人折簡招尋屏肉食

與客共飽昆侖蘋傳聞塞外大徵發八月已灑三尺雪
文士沙堆卧鐵衣夜聽人唱關山月吾曹放浪蒹葭中
俯視一切皆虛空席地滿斟牛馬漚何如槽滴珍珠紅

次韻酬陸松澗

二陸東西住兄難弟亦難所欣塵客至不作俗人看垂
幕涼初引傳杯夜漸闌我曾游洛下縞紵易盟寒
此會期真率相過不送迎顛狂輸鼓吏質樸學田更塵
夢已云遠寸心何處傾麴生風味好可結歲寒情

至蓮社菴訪悟微上人和東坡秀州僧本瑩靜

照堂韻

浩浩水東注茫茫日西馳骨肉未歸土魂氣無不之秋

士感風物壯心易傷悲城南有蘭若徐步忘形疲菴亦
名蓮社淵明知是誰欣然有會意惜無三徑資若能設
尊酒時與遠公嬉聊結方外友宰官亦何爲

與松澗研濤飲鮑心竹家和東坡杜介熙熙堂

韻

小園花木路幽回難得尊前笑口開深夜談諧忘主客
涼天星月敞樓臺漁樵大抵捐機事陵谷從他變劫灰
玉漏未殘人已醉餘鼾共聽鼻如雷

戲簡松澗和東坡樂著作送酒韻

斷飲經時欲覆觴秋宵無奈漏聲長知君香滿東籬下
泛菊應傾般若湯

余近常和陶蘇二公詩有謂陶詩不能學蘇詩
不可學者余意以爲不然因作五古二首

人謂淵明詩其才本於天我謂淵明詩攻苦應窮年人
謂淵明詩出語多自然我謂鍾鍊久精金費磨鑄人謂
淵明詩忘情絕塵緣我謂頗用世憂樂未棄捐人謂淵
明詩和平得真詮我謂遭陽九憤鬱嗟迍邐難解家國
恨筆墨不可傳超超遠埃壒但書義熙年蕭然任環堵
所蓄琴無絃味其集中作感諷溢喉咽食薇水可飲銜
木海欲填園田守其拙聲名若浮煙飢驅寧乞食束帶
非所便保身復明哲嘯傲遊斜川南邨自怡悅肯受人
哀憐高歌以寄興情不塵網牽如鶴入霄漢隨風恣盤

旋如魚任游泳朝夕清泠淵又如天馬嘶未可施鞍韉
與衆本殊趨淡雅春風妍置之楚辭後自足成一編譬
彼人得道食蜜甜中邊黃金鑄陶令今古無此賢

東坡天分異乃是飛仙儔所遇多失意善於言窮愁不
爲肉食鄙常抱蒼生憂間關歷危苦忠信遭咆哮生涯
極落拓氣宇仍優游濃淡無不有子史皆旁搜有時破
蟣虱有時弄蛟虬有時談賢聖有時說俳優有時歌浩
蕩有時語悲啾有時雷霆發有時繭絲抽隨其意所至
超妙非人謀揮毫薄往古託興凌滄洲渾脫舞劍器開
爽橫清秋其高去人遠插漢崑崙命丘勢如江海大浩浩
無細流一瀉千百里奔放難停留靡所不容納頗類萬

斛舟珠玉與沙礫美惡常兼收小疵時所有未可吹毛
求我怪庸妄士謗議紛嘲啁以此學詩者耳食操戈矛
口不道蘇字遠之等仇讐競欲撼大樹羣兒笑蚍蜉效
顰亦未敢意勢常思偷辦香禮玉局吾願低吾頭

和陶飲酒二十首

余以酒成疾斷飲者十年矣酒綠燈紅見獵心喜
雖力自檢制往往情不自禁因和淵明詩以當屠
門大嚼之意

當日號善飲舉杯頗好之次公醒而狂况復無醒時詎
知脾氣損痼疾竟若茲脾疾未至死止酒常自疑久與
杜康別何爲過矜持

不欲近塵俗遁跡還家山日暖花含笑春深鳥能言薌
澤履舄錯惟將酒爲年斗醉石亦醉淳于至今傳

他家願富貴無足纓余情即時一杯酒自勝身後名世
間風味惡不可忘麴生談辨隨我意四筵皆震驚於今
秫田熟所望惟西成

有足皆能走有翼皆能飛不飛亦不走自問中腸悲一
尊驅萬恨晨夕聊可依死葬陶家側精爽長不歸何至
虛日月坐令顏色衰髮白齒又落吁嗟心事違

但期市井遠難避風塵喧隨時可酣適莫怨造物偏孟
陽爲運使飲酒遊名山靜知潛魚樂閒與飛鳥還貴賤
同一醉我非荒唐言

萬轍共千途誰非復誰是於世已兩忘何爲相訾毀止
怨曰無爭我今聊復爾三爵竟陶然揮絃彈綠綺
餘香在籬下秋菊有落英釀之以爲酒暢飲留歡情但
求肝膽照不問天地傾退筆欲成塚寶刀時哀鳴恩讐
盡棄置雲水寄此生

霜風淒以厲松柏留貞姿衆卉皆凋謝亭亭歲寒枝久
要心不變始是男子奇蜉蝣過太虛若輩何能爲世無
輕醉客醉客多不羈

柴門亦虛設數日何曾開風雨不能蔽茅居無好懷平
生素骯髒宜與人事乖卷簾待月上鴉宿雞羣棲呼燈
泛新醪一飲醉如泥斗冷索半臂雨聲滴苔階登樓望

萬瓦咫尺皆昏迷枕上傾耳聽似聞棹歌回

生計一何拙自憐失東隅斯民非太古難以耳目塗舉
世智力盡皆爲名所驅勿復展斷簡古人糟粕餘開尊
聊獨酌寧與木石居

緇塵染素衣饑走長安道榮名未可成年齒忽已老茫
茫變劫灰天地亦枯槁却笑武夸君還唱人間好李白
曾有言藏身酒爲寶我笑攜壺觴御風入雲表

人生不得志發語多傷時頭顱且可贈卮酒安足辭經
籍皮高閣誰云文在茲牙期久不作交態多猜疑我自
用我法寧慮人相欺世界名缺陷此身竟何之

無事可立身何方是佳境欲飲中山酒三年始一醒人

情變刃深不得其要領養晦但遵時如何露鋒穎清晝
懶出遊勿云夜燭炳

剥啄誰敲門漁翁挈筐至彼有魚可餐我有酒可醉對
飲兩醺然高談無倫次僮僕謗主人奈何不自貴取其
有天機何必通臭味

畧蓋一把茅寄居十尺宅小窗網蛛絲破壁蝕蝸跡來
日苦無多屈指年半百此邦有醇醪滿酌十月白達人
雖達觀微軀亦愛惜

先公不治產遺子惟一經杏花落春雨敗舉終無成名
場苦蹭蹬身事愁紛更荒徑不復掃蓬蒿滿閒庭醉聽
鼻中息共笑如雷鳴年來悔結納莫問香火情

酒信故人約非如石尤風陳遵殊多事客轄投井中此
心了然悟境界無窮通扶桑亦可射吾欲彎強弓

勿憂楚弓亡勿喜塞馬得憂喜勞汝形大愚亦大惑萬
古無奇人爲人啓茅塞餘年老糟丘夢入頓遜國喧呶
意所憎廣座常默默

思之已爛熟誰能爲貧仕俊傑宜識時燕知避戊己豈
不期功名猶將惜廉恥濁醪過牆頭一醉賴鄰里鬢髮
白者多何勞問年紀筋力漸欲衰自顧羞容止笑囑五
陵兒少年不可恃

浮沈以玩世惟欲全天眞事事引繩墨澆風或還淳凶
終互相戒頭白交如新縱橫豈奇術掉舌嗤儀秦滄桑

看屢變東海將揚塵鉅公門庭峻何處通殷勤會心不
在遠喜與魚鳥親樊籠思解脫覺路開迷津酒是腐腸
藥漉之污吾巾既恐多謬誤慎無爲醉人

和陶擬古九首

夜雨落簷花秋風凋岸柳與君傾蓋逢即知交不久盛
衰一旦殊誰念布衣友方同憂患時膠結濃於酒盟誓
重鬼神死生不背負棄捐或下石那復存忠厚始之能
終之今日何處有

慷慨置尊酒高歌曲將終不與妻子別結束思從戎我
聞傅介子膽氣萬夫雄手提名王首來往如颶風長笑
李少卿兵盡矢亦窮仗劍走朔漠橫行匈奴中

飲酒滿堂樂一人徒向隅春溫秋肅殺時序異慘舒雲
中落雙鶴晨夕倚蓬蘆引吭似訴我來此伴索居月夜
聞清唳戢翼棲榛蕪骨肉皆隔絕思之意悽如

樓臺昔金碧今歎草樹荒居人爲余說此是綠野堂高
門聲勢盛衰謝空茫茫花木不愛護變爲荆棘塲挽歌
悲薤露零落歸北邙松楸互掩映碑碣相低昂黃腸蔽
其體未有不死方華表非金鑄雖貧亦何傷

南方有狂士氣足精神完不衫亦不履見客常不冠牀
頭金已盡無改壯士顏機鋒解禪理頗悟觸背關天懷
高以曠如在青雲端人物隨好醜不肯相譏彈四愁張
平子五噫梁伯鸞舉手謝熱客願居水雲寒

山河形不改今昔常如茲物情難揣測翻覆無定時有
人秉微尚不患磷與緇自謂能責己反爲人所疑中懷
甚磊落真率無浮辭論交雖寡合去後常見思可以質
神鬼此心一無欺鳳皇翔千仞寧受燕雀嗤濡毫多危
苦難作懽喜詩

珠傷璧欲碎懷寶憐隋和唾壺擊盡缺烈士徒悲歌不
嗟遇合晚所苦歲月多春風屬年少得意長安花男兒
身已老長嘯遊無何

花韉黃金勒曾作豪俠遊逢迎到處有足跡半九州纏
頭贈紅錦洗耳臨清流無論愚與聖相率歸山丘長生
無大藥甲子能幾周安時且任運知足勿外求

詩書猶可讀藜藿猶可采丈夫自有真石爛亦不改畫
餅難充饑泥牛欲渡海劍沈刻舟求兔去守株待燃彼
大智燈癡迷應懺悔

和陶雜詩十二首

嗒焉隱几坐掃盡萬劫塵三塗非實境四大皆妄身足
音空谷絕惟與燈火親酒能使人睡欲飲常乞鄰雞鳴
窗影黑敲枕難及晨槐國倘可到寧爲夢中人

劬藥入名山餐霞坐翠嶺保此內外中黃庭說三景飛
騰縱所如豈畏玉宇冷恍惚見樓臺蓬萊路非永俯首
看世人開顏笑塵影冠蓋紛喧闐利名互馳騁所以黃
老家其言主清靜

功成身必退那許通商量辟穀飢欲死我憐張子房不
然與韓信同日斬未央刃刺牛被繡霜隕葵傾陽純灰
以三斛洗滌人熱腸

觸處皆愁城天愁天亦老廊廟忽江湖富貴那可保喜
若湛露零怒如炎陽燥牽犬出東門抽身苦不早采木
作棟梁斧斤斫合抱曳尾泥塗中自尋長生道

熱客非忘歸躊躇意猶豫鷓鴣東西飛開翅必南翥豈
不惜青春飄然背我去六根動五情八識攢萬慮泉雨
雜松風呵殿安能如林園得幽閒況有醉鄉住沈沒苦
海中渺茫泊何處車前無八騶達者非所懼

轉語破虛空宗風學禪喜出家大丈夫原非將相事一

踏足攔胸始知祖師意十二因緣來偏與人相值日月
不暫停雙輪轉何駛不見過隙駒速如乘疾置

但求衣食足不致饑寒迫何必累千萬何必連阡陌野
外塚累累燐青骸骨白持籌會計勞頗覺氣量窄君子
宜忘貧何至作賈客今日瓦礫塲舊爲五侯宅

閭閻一歲計所務惟耕桑秦晉屢苦旱居人鮮秕糠東
南民力竭棲畝無餘糧寒谷望溫氣未能遇鄒陽金饑
更木毀所惜農事傷轉餉半天下結陣屯遐方偃武好
生德杞憂欲停觴

發言根至性首鼠忌兩端傲倖求後福荷戈遠謫遷瘦
肌凍欲坼款段行危巔費糧能有幾不得飽一餐擡頭

瞻天闕恐絕青雲綠沙塵老霜雪難賦歸來篇

談言多微中往往近滑稽違衆不和物亦應號乖厓歌
聲出金石以散壯士懷狂欲遊大莫氣能蓋須彌閉門
無一事奴僕心睽離獨處私自喜逍遙脫塵羈山鷄猶
自愛不使毛羽虧

海燕知社日秋風漸淒涼呢喃對我語作別辭雕梁臨
行屢回顧如人去其鄉故壘亦自惜輕軀畏繁霜來歲
再相見春和日舒長

還我話頭來佛法無多子箇裏著力難無爲失所倚羅
漢亦打包涅槃須料理

和陶詠貧士七首

咄咄誠怪事孤踪欲何依夜深仰屋歎忽見星月輝風
來聲颯颯窗紙常斜飛無處可假蓋未雨先愁歸低頭
見妻子感額憂輞饑身窮興亦盡壯志空傷悲

瓦破以茅補自名高士軒提壺暮賒酒抱甕晨灌園門
前誰送米累日廚斷煙繩牀三支脚點易無朱研途中
遇親戚掉頭不交言范丹塵生甑可以希前賢

虛室何所有但存一張琴琴絃凍已折不成流水音袁
安雖卧雪掃雪誰追尋王弘不送酒無酒可酌斟含毫
答惠貺重疊謝所欽簞瓢歌慷慨擊節時撫心

時人共輕賤微小如邾婁忽復遇知己自云貴當酬曝
背南窗下栩栩夢莊周雖抱終身戚尚無一日憂但有

形與影邈焉寡匹儔橫財非所望不可智力求
窮達有定命榮祿寧可干儒生重氣節無以物亂官讀
書會我意欣然竟忘餐俯仰不愧忤從人笑酸寒曠懷
化城府屢空仍歡顏閒居隨寓適肯入名利關
洗面盛雨水煮茶掃霜蓬長吟世傳誦窮者詩常工叔
度似顏子禮賢無王龔悟禪讀圓覺學道思參同高薨
亦鱗次不必姓字通進退苟失據吉凶將安從
安車徵不至漢有徐南州願偕山水友遂結猿鶴儔地
卑屋復漏牀前水橫流年熟米價賤囊空仍隱憂百結
頗浩落慨然與人酬長貧欣自得所患身不修

八月二十四日出城觀田家刈早稻和陶丙辰

歲八月中於下溪田舍獲

氣和初日旭步出城西隈婦子紛刈稻田夫頗舒懷三
時勞四體及此願已諧炊殘飯亦熟況鳴午時雞抱禾
入小舟滿載欣然回昔憂九夏旱車水歌聲哀憫農天
降雨相顧愁顏開不然父老餓何以慰衰頹歲功苦勤
動恒慮水旱乖有秋共志喜百室安深棲

九月一日舟中見稻已登場和陶庚戌歲九月
中於西田獲早稻

人爲求食計憂患常萬端餬口大不易何時得身安乞
憐大官飽其狀不足觀農夫自食力朝出暮始還收穫
一失望妻饑子號寒顆粒皆辛苦稼穡殊艱難男耕與

女媧攘攘來河干心勞手足瘁操作無權顏茅屋何所
有葦門常不關但爲秋成望餘者非所歎

松澗招飲清豫堂和東坡王鞏清虛堂韻

自詡汪倫亦快士碧潭千尺桃花水故人治具相招尋
爲我拂拭烏皮几筵前止酒恐發狂局中對弈常思睡
但有奚奴負錦囊得句嘔心未肯已地無生客絕將迎
密友往還殊省事何人右職誰左官總不關心不入耳

遊高園和陶游斜川

浮雲視名位自分卑微休北園十里許聊結物外遊挂
帆隱初日打槳衝清流矯矯雲中鶴飄飄波上鷗樓臺
煙氣繞瀟灑如蓬丘林塘徑屈曲登眺攜同儔松間風
謾謾好鳥鳴相酬吻渴欲賒酒問有酒家不我非貪杯
杓聊以解積憂今日遊頗樂此外何他求

和陶九日閒居

右杯復左蟹便足了一生舉俗何所爲乃有九日名畢
竟久九異此理殊難明

魏文帝九日與鍾繇書九者久也俗以日月并應宜於長久故以饗燕高會

風飄

木葉脫飈颺聞秋聲南陽有大菊可以延餘齡安得甘
谷水釀酒深杯傾霜風漸淒凜草木難滋榮盛衰一轍
耳豈足移我情重陽無風雨所喜田功成

和陶己酉歲九月九日

朋以耐久貴勿訂青雲交梧桐雖棲鳳零落非後彫山
清氣色爽秋深覺天高御風游碧落吸露凌丹霄久與

天機遠方覺人事勞江難實漏卮海亦洩沃焦娑婆世
界苦頗怨洪鈞陶且爲茱萸會薄醉酬芳朝

九日登弄珠樓和東坡九日黃樓韻

九日登高是誰說未能免俗佳興發秋雲初結紅日遮
曉露未乾翠苔滑到岸舉頭防落帽登樓拾級更繫襪
潮初卷浪聲砢砢風欲凌人衣翕呷住處但牽張融船
行時每荷劉伶鍤何人濯足弄清泉俗子安知風景殺
我思聳身歷浮圖又將信步尋古剎一枝柔櫓蕩小舟
延緣葦間聲軋軋叩舷擊楫和漁歌湖面濛濛煙氣壓
鴉陣斜飛林影殘水光迴抱城齒齧其興頗倦將無歸
絕似水邨晚來鴨願作浮家泛宅人年年縱櫂游苕霅

和東坡秋懷二首韻

四時秋頗慘況在深秋時優游潘仁興蕭瑟宋玉悲零
露霑我裳淒風入我幃鼠雀啄困米百錢買飢狸密葉
漸以脫林樹無深枝春風豔桃李此景安能追循環不
停軌榮悴有定期天道已如此念此空怨咨傲霜開江
上豈笑芙蓉遲

陋巷寂無人廉纖滴涼雨埋頭黃卷中但與聖賢語有
口欲言錢繞牀無阿堵未得此心安甚爲造化苦剝啄
故友來匆匆設雞黍酌酒至夜闌月光映銀浦客勸蹋
洛塵胡爲處隴畝知己有幾人深情向誰吐

和陶詠二疏

引年自乞休揮手徑歸去竝駕出都門同航林壑趣鯤
欲溟渤游鳳思雲霄舉後世欽高風漢庭失賢傅天子
不得留供張滿前路脫鞅辭簪裾掉頭肯返顧道旁空
歎息非以邀名譽君恩難久長俊傑識時務高起散金
臺歡顏遍寒素餞送多公卿幾人能領悟大率功名牽
競爲得失慮籍咸共佯狂至今名亦著

和陶詠三良

秦穆有亂命康公遵其遺死者不可諫其言豈輕微業
以身許國此身難自私宿昔承主眷音容隔靈帷捐軀
從地下臣節無敢虧生旣不相忤死亦同所歸慷慨埋
黃土長與妻子違悠悠千載後所惜知者希勿爲嗣君
惜勿爲三良悲百身何能贖但悔披朝衣

和陶詠荆軻

荆軻自歌哭原不讐強羸邂逅得知己禮之如上卿一
諾許以死目中無咸京暫留待吾客太子遲其行蕭蕭
易水風髮怒衝冠纓賓客知其事慨然惜豪英送者垂
涕淚變徵復羽聲就車終不顧四野愁雲生圖窮匕首
見惶急君臣驚本欲生劫之約契垂鴻名朝服袖已絕
環柱追秦庭郎中執兵者殿下圍如城負劍王負劍聲
亂蠅營營箕踞倚柱笑其事遂不成筑擊漸離死酒人
有餘情

葉笠亭見僕和陶田居詩因和江文通擬陶見

贈依韻答之

心安是吾鄉長嘯辭紫陌不聞車馬喧瀟灑意頗適酒
伴詩人來聊以永朝夕人生困根塵六驥過沒隙不爲
千歲憂肯受萬物役稚子春勸耕細君夜勤績無事讀
我書開卷自有益

嘲蠅

蠅之爲物憎之者非一人或文以驅之或檄以討
之余謂世間如蠅者頗多不足責也作詩嘲之而
已

有蟲微細名蒼蠅紅頭白腹飛薨薨清涼世界無此物
其性所好趨炎蒸晨昏溷廁以身託時食不潔此中樂
紛陳肴核列賓筵橫據盤中恣大嚼報赦非比青衣童
又非點墨污屏風庫狄遷怒杖門吏王思投筆揮霜鋒
逐臭慕羶不肯止鷹頭驥尾強攀倚揮塵一笑問主人
適從何來集於此

招湯紹衣沈東表東湖夜飲和東坡夜泛西湖
絕句五首韻

夢穩心閒跡漸安偶來舊雨小盤桓一尊同泛船頭月
樹影煙光畫裏看

水天一色碧雲垂十頃玻璃景物奇綠酒紅裙撩痛飲
無才端合老 明時

少日麤豪一劍橫知非伯玉已同庚諸公莫笑心猶壯

中夜荒雞豈惡聲

愁來身世兩茫茫黃菊紅萸發晚香水面浮圖垂倒影
月中疑放玉毫光

忘情塵俗似遊仙銀漢橫空月滿川攜手相看俱健者
御風無計亦泠然

松澗枉詩見嘲次韻奉答

幽情宛轉暗香聞重見留仙襞皺裙面粉懶勻人欲醉
額黃初退夜將分鑪邊卓氏挑司馬陌上羅敷笑使君
老我黑甜鼾一枕巫山何處夢爲雲

以拙稿乞查編修悔餘作序并訂次日小飲和
東坡書林逋詩後韻

僑寓平湖湖一曲漁舟縱觀山水綠忽聞悔餘先生來
如披雲霧對珠玉生平跋扈寡輪心舉世惟君能拔俗
操觚握槩競談詩却笑夜行徒秉燭七寶莊嚴皇甫君
爲我作序願已足羞言富貴自有之何必持梁與食肉
閒時閒地可閒吟不恨有司不見錄與君一別十年餘
何幸相逢通款曲屏跡息影欲避人借居空宅便栽竹
折簡文星過草堂東籬況有數叢菊

林大令鳳溪見示過蘿軒先生園中小飲之作
率筆奉和

屏從來過司馬園名區雅集倒芳尊濠梁水曲遊魚樂
叢桂巖幽宿鳥喧綠野時開塵事少東山高卧素心論

遙知賓主忘言象雲影湖陰遠市門
花封百里樂堯年共說琴堂奏雅絃興至談諧明月下
公餘觴詠晚秋天深林風定煙光直小閣參橫夜色偏
懶習因循應自笑未曾閒泛孝廉船

鳳溪大令招陪蘿軒先生讌集

白頭遺老主詞場杖履追陪夜未央小按紅牙歌玉樹
斜垂翠袖舞霓裳延齡共進南山酒蘿軒先生初度鳳溪置酒為祝引滿時
浮北海觴漫說徵伶誇絕藝矜持不似少年狂

自知潦倒更麤疎卜築城南愛索居安邑下交留仲叔
臨邛虛左待相如倦飛繞樹無枝鵲掉尾尋淵失水魚
一笠一蓑吾計浚軟紅莫更上公車

題笠亭小照

桃李春風眼倦看偶來松下小盤桓愛他勁節高千尺
蓋偃枝虬耐歲寒

脩竹窗前一片雲新篁舊翠影繽紛可知不肯因人熱
散盡炎風是此君

活火初烹泛乳花龍團雀舌雨前茅不耽元石三年酒
但飲盧仝七椀茶
洗硯池邊去墨精鷓鴣翡翠水中明松花石子人爭羨
誰向端溪問舊坑

戲簡笠亭和東坡趙令鑠惠酒韻

人處天地間跡如過客寓開尊迭主賓藉以慰晨暮廚

中阮步兵缸邊畢吏部家釀瓶已罄亦可雜市酤隨意
列盤餐何必煩治具不飲復不譚無由示情素

笠亭和韻見酬且以斗酒相餉因再和東坡韻
答之兼訂後會

步兵有詠懷正字頗感寓獨居虛室中何以度朝暮
磊難消除愁堆上下部高談障礙空不必清濁酤黍雞
稻蟹肥飭廚早張具折簡招故人挑燈話心素

納稼滿困余買升斗自給家人有不平之色詩

以曉之和東坡糴米韻

穀多其價平千斛已在市不數牀頭錢焉知釜中味譬
如負郭田今歲皆赤地未曾秉耒耕飽食原自媿賣書

買米歸束薪煮香穉奴僕頗不平那曉主人意

翁越岑見過和東坡陳季常見過三首韻

叩戶剥啄喧誰來訪閑客我友停高車不嫌門巷窄操
刀童斫雞炊竈婢煮麥世情何足言相對浮大白

悲歌慷以慨頗有燕趙風隨身無竿木但在羈旅中自
憐馬卿病難送昌黎窮忘機話故舊所幸懽笑同
有鳥曾傷弓高飛避曲木如叅黃楊禪兀閨時倒縮叢
桂招小山倚蘭傷空谷晨夕論素心君來慰幽獨

和東坡薄命佳人韻

膚如凝脂眼點漆啓唇微笑光的皜神人疑自藐姑來
朱粉翻嫌汚玉質風流絕世多嬌癡柔情密意無人知

勸君憐取妾命薄莫待翠凋與紅落

招同人雅集和東坡竹間亭小酌韻

須彌等芥子滄海如濫觴但尋友朋樂便覺意味長久
迷十里霧今處千仞岡新炊雲子白宿釀鶯兒黃此日
頗可惜深宵未渠央露篁發地籟月桂聞天香揮毫泣
神鬼擊節歌伊涼叱嗟蛾投燄歎詫葵傾陽散材甘樗
櫟珍器慚珪璋久要互主客身世已兩忘

閉戶謝客靜處一室中得衛如弟家書喜而有

作和陶癸卯十二月中作與從弟敬遠

作論廣孝標往還久斷絕塵積几案間柴門時晝閉擁
褐畏曉風輕陰欲釀雪忽得賢弟書字句頗修潔自言

滯京華進退無施設家累良可憂近常學禪悅一經傳
後人高曾有遺烈養晦但遵時矯矯見風節久知世事
艱寧守吾道拙朝貴多忍饑榮枯何分別

與友人同舟過高文恪墓和陶諸人共游周家

墓柏下

松風聲謾謾如聽哀絃彈長眠無昏曉念此慘不懽死
生亦大矣何以駐朱顏日月雙轉轂吁嗟歲云殫

項苧城沈東表陸研濤過訪和陶示周續之祖

企謝景夸

遁跡頗自得窮居寡所欣雖非六月息我豈蓬蒿人殊
損懽樂趣聊爲清淨因偷安旦夕保何意外侮臻山鬼

伎有限不見亦不聞但期免話諍敢望通殷勤可知風俗薄寧與煙霞鄰不如乘桴去垂釣寂寞濱

張德柔翁越岑過訪和陶怨詩楚調示龐主簿

鄧治中

吾身雖最爾吾氣自浩然雙輪互上下倏已知非年苑枯隨所遇敢怨造物偏無以具饘粥空有城南田傳家惟清白未有數畝廛外戶常不閉枕書但高眠松筠本性在不與世運遷羣兒拍手笑但顧耳目前富貴過我眼眎之若雲煙總爲塚中骨誰聖誰是賢

和陶連雨獨飲

經時雨不止對酒意豁然所欣足音絕何必空谷聞醉鄉風景別顏放如神仙憑凡倦即睡恍惚游釣天活身有至樂道在太極先歲月袞袞去已去不肯還引杯導血氣可以求長年麴生是吾友餘子何足言

十月十日沈東表招同項苧城游陳山和東坡

游徑山韻

城南青翠名陳山嘔啞雙槽行晴川嚙岸拍天浪澎湃打頭撲面風回旋乍浦已至日卓午蹄泔杯水非深淵舍舟而徒足頗勸望山疑在昆侖巔樓臺宛然人竟去不見玉井顏如蓮其步趨趨行不于路人笑我遊蚰蜒上方清磬落雲表解脫擬學凡夫禪橋外酒帘招我飲杖頭三百青銅錢鑪邊小飲輒大醉垂目顏放思酣眠

斜陽欲落野昏黑啾啾漸見投林鳶長年換舵指歸路
一盞蟹眼茶初煎新月半鈎明水底挑燈促坐言便便
城市煩囂不得意茲遊暫得心超然豪氣未除湖海士
憑他哀樂傷中年

十月十八日德柔越岑招遊陳山和東坡再遊

徑山韻

屏除塵務心灑濯忽有人呼夢中覺治具約我遊陳山
步屨出門手同握諸公健者余懶人豈可同年議豐确
下船雜坐復縱譚頗似羣仙會高嶽賭棋落子費沈吟
分韻題箋苦刻琢挂帆風正水滌洄到岸路斜行撲朔
共驚四座忽生光爲有懸黎與和璞履舄相錯薌澤聞

尊中有酒何不捉藏鈎射覆誰爲雄淩勝須臾三奪槊
一曲琴爲牛雉鳴聽之猶能識宮角淪淪入耳聲和平
始知箏笛不足學雲陰漠漠結半空雨意蕭蕭洗五濁
邨南煙舍門已扃繫艇篝燈競剝啄掃眉才子道勝常
勿厭吾曹往來數

偕桂校書飲南園和東坡攜妓樂遊張山人園
韻

麗人重來徑路熟隨意攀松復倚竹凌波羅襪不生塵
蓮步輕盈遍谿谷翠羽明珠妝束殊驚鴻游龍來去速
三冬煖氣吾已無自笑寒巖倚枯木

十月二十一日雪和東坡雪齋韻

君不見停杯訪戴行百里剡溪往還卧船底韻事前煎茶
對曼姬粗人但解浮綠蟻此身猶在塵埃中敢說避世
王君公後漢書逢萌傳避世牆東王君公欲披鶴氅到靈隱鷲毛亂舞飛來
峰越人自計宜安越荀子越人安越醉詠蕭齋堪累月窮邊多少
望鄉人夜凍天山三丈雪

與客飲研濤齋頭和東坡與梁左藏會飲傅國

博家韻

少年盾鼻磨墨檄使酒罵座推第一斬頭陷胸何足云
衆口譏彈語籍籍近來避人如避兵韜晦退藏畏鋒鏑
紛紛鬼蜮恣跳梁木怪山精白晝出停觴却坐默無聲
鄧禹笑人爲寂寂我欲逃禪學講經點頭但望山中石

招友人夜話讀書堂和東坡谷林堂韻

與世頗杳鑿自知意氣疎招尋忘形友渾噩如古初縱
譚寡莊語傾耳能起予忽作禪七喝有時鬼一車鄙事
道委曲解頤共軒渠真率無城府始知方寸虛古人所
傳後大抵糟粕餘新語誰蒼萃可成一編書

落齒和昌黎

髮白已不堪奈何更落齒所苦旬日來動搖勢不已倉
卒墮手中豁然痛遂止老大形漸殘自憐還自恥官骸
無一真我本不畏死丈夫貴晚成邂逅得知己兩齒含
口中垂竿釣渭水不至似鼠無猶能古人比有客勸補
之刻玉可相似餘者雖僅存參差亦危矣已過春夏秋

季冬曰窮紀生寄五十年光陰如彈指真者與我辭
者何足恃零落無所存空空殊莞爾耳聵不能聞目盲
不能視不視復不聞糊塗更欣喜饘飯去稗砂羶葷擇
軟美兒齒倘更生始爲奇男子

是晚復落一齒再和昌黎

晨旣落一齒暮復落一齒方其未落時呻吟痛不已排
豎漸頹殘其勢何所止兒童共揶揄自問無愧恥北邙
多少年或以齧齧死齧齧復齧齧何曾礙修己友人惠
祕方早起嗽藥水自誇效頗神功力罔與比嗽之久逾
堅金石可相似左鑿右又鑿荒唐可知矣齒亡以質剛
況復此年紀方物列盤餐空勞動食指象以焚其身有
之不足恃掩口自憫然反唇人啞爾所恨雙頰頰朋來
每諦視欲求果老鎚盡去差可喜窳詰何必存更生新
者美七箸駛如風大嚼羨稚子

簡越岑和陶酬劉柴桑

嗒焉類南郭遽然亦莊周飲水知冷煖閱時忘春秋掃
徑來舊雨力田服先疇糠粃視堯舜勲華今在不披髮
入山去欲爲汗漫游

和陶有會而作

鼎烹與蔬食同一充其飢多病意自得瘦狂勝癡肥奇
溫綿亦好何必求兼衣路岐楊朱泣絲染墨子悲左計
悔已晚安能追前非我見勢所去棄之如脫遺要人登

右職趨奉羣依歸酷愛宋儒語一心爲嚴師

送越岑謁選北上和陶與殷晉安別

與君客京洛投契來往勤肺肝可出示笑語時相親舉
足不數武僦居如結鄰上下話今古杯酒夜復晨南還
余垂翅握手不忍分自愧處寒谷君至回陽春住此能
幾日又爲出岫雲臨岐鄭重別勿忘香火因於今民力
竭官況多清貧自託君子交敢以言贈人

再送越岑和陶贈羊長史

吾道窮至此閒居頗艱虞長才非百里俛首事簿書車
從殊簡略安能雅且都雪花舞馬首辛苦關山踰揮鞭
指鳳闕佳氣何扶輿迴頭遠骨肉但與僮僕俱撫景獨

惆悵臨風自踟躕落日照古道遊子情悽如不傷征塵
瘁不惜田園蕪所嗟簡書畏暫隔萊衣娛南北數千里
鱗鴻音信疎旨甘得迎養始覺心神舒

南園送德柔

和陶於王撫軍座送客
霜嚴風淒厲滿目草葉腓徘徊悵岐路攜手送客歸交
情棄如土此去胡所依我跡類斷梗吁嗟故人違敗絮
行荆棘念子能不悲欲發更小住河流漾晴暉簞瓢亦
可樂遇合何其遲蚌胎珠未剖誰惜滄海遺

鳳溪大令招陪楊學士蘿村先生讌集和東坡

陪歐陽公宴西湖韻

頽髮修髯灑輕雪紅光豔豔浮兩頰意氣真能雄萬夫

酒酣抵掌談激烈歲寒勁節凌嚴霜心如皦日何輝煌
精神龍馬性薑桂通家年少容顛狂大笑炎涼世情惡
神方駐景却老藥隨處名山有洞天無爲更說京華樂
安石不出忘蒼生綠尊滿酌紅燈明筵前小史鶯語滑
錦衣玉貌彈銀箏

冬至日得雙白姪字和東坡冬至日贈安節韻

我來夏未終今已一之日長短任寸陰閒吟自擁膝齒
豁耳欲聾老羸漸癯疾僻地魚雁稀何人通尺一枯坐
愛逃禪雙趺學面壁阿咸寄平安三復喜賢姪出戶即
駭機思之常股栗女媧不補天空鍊五色石彈琴飲濁
酒癡叔志願畢東海有波臣西江無涓滴

與友人飲葉右水齋頭和東坡與趙陳同過歐

陽叔弼所治小齋戲作韻

眼花眩銀海鼻觀擁玉廬酒伴招我飲殷勤飛尺書賞
奇元亮宅問字揚子居是時雪初霽溫煖如春餘高懷
齊萬物浩氣立四虛人心不可料啓齒一軒渠衆口任
嚼啗眇然獨愁予排悶惟引滿盤餐有嘉蔬手持無腸
蟹飽啖巨口魚曲身煖得直可不譏蘧篨

至南園觀劇以浣雪二字爲韻

經時不出門胸次頗蕭散人笑彥國狂自知叔夜懶徐
步過名園佳招開華館久停酒百觚但啜茶七椀顧曲
按紅牙遲聲媚翠管垂手舞亭亭點唇歌緩緩翡翠帷花

江續集卷一
氣深錦罽香風暖院落燈影重林塘月光滿興託遊俠
場情懷少年伴長吟豔體詩手以薇露浣

大地鋪瓊瑤霏霏灑時雪木號朔風寒船阻堅冰冽若
非雜俳優何以舒鬱結三搥羯鼓高一弄簫聲咽宛轉
語離籠襪襪飛丹穴新浴七香湯濃熏百和屑鬢插鳳
頭釵裙拖魚子纈別曲翠睂低瓶梅纖手折睡鴨火尚
溫藏鬪酒未竭烈士有壯心高歌唾壺缺

醉歌行和葉右水韻

莫笑余酒狂體中癡黠半既不如賣絹牙郎操奇贏又
不如珥筆小兒弄柔翰洛生懶作老婢聲儒林難入貨
殖傳忘機來往盟沙鷗大戰蠻觸唾蝸牛誰閒誰忙世

誰辨不若共作糟丘遊詩酒與琴爲三友高風人說香
山叟大絃小絃不能彈五字七字自知醜爲君飲爲君
歌雙丸組織無停梭百年雖有三萬六千日大率樂時
頗少愁時多眼花頭白牙齒落若不泥飲將如何況我
胸中有塊磊澆之恨不酒如海醉來天地亦微塵軒冕
簪紳豈常在開門但見一車鬼

招右水小飲和東坡谿陰堂韻

寒肌生粟思轟飲硬語橫空費苦吟惟有冷哦閒醉好
可知我輩惜分陰

右水不至再和前韻

辟寒偶爾邀茶話排悶應來共醉吟不比剡溪經宿至

江續集卷一
三
翻嫌雪夜出山陰

招右水三和前韻

吹脣欲作蘇門嘯抱膝常爲梁甫吟舊約未曾償酒債
自添鑪火掃花陰

簡右水四和前韻

窮途不作迴車慟閒卧時爲感遇吟有酒盈尊應酤我
月來鏡閣結清陰

右水小齋
顏曰鏡閣

右水招飲以事未赴五和前韻

曉風殘月柳三變細雨輕寒溫八吟繭紙麝煤龍尾硯
同來消遣一庭陰

右水以詩招飲時已薄暮六和前韻

地濕往還無蠟屐夜寒倡和輟清吟何如竟日高齋坐
領略晨光與夕陰

簡右水七和前韻

顛狂吏部缸邊醉顛顛三閭澤畔吟驅冷但宜詩與酒
天將釀雪結層陰

會飲鏡閣八和前韻

抵掌縱談天下事快心閒和郢中吟酒闌待月忘歸去
竹徑蕭蕭散碧陰

招右水九和前韻

荒徑招邀真率會枯腸搜索短長吟報晴喜聽巡簷鵲
爽氣朝來解宿陰

戲簡右水十和前韻

獨處定知心寂寞相邀何事意沈吟未還酒債兼詩債
莫負花陰與月陰

蝴蝶歌

蘿軒先生視學嶺南按部瓊州時有黃蝶數百飛
遶梳竿舟人以為神蝶先生繪圖自題蝴蝶歌一
首屬余奉和

畫船簫鼓揚蜺旌使君心跡知雙清既仗忠信神所衛
祥雲鬢鬢風泠泠文星到處蛟虬避忽有黃蝶來空冥
百尺牙檣互回繞香鬢粉翅如相迎水天一色氣融朗
浩浩蕩蕩遊滄溟輕塵不飛散雲錦波平鏡面光晶熒

擢夫秦功勢頗疾工師倡和聲堪聽文章華國傳海外
正誼明道惟通經彼都人士素樸陋啓蒙振鐸迷初醒
海於天地物最鉅其中往往多精靈盲風怪雨總不作
晴山遠列開圍屏先生執筆書所見掀髯四望憑窗櫺
却笑澹臺血氣勇雙龍夾舸揮青萍不信但看圖上蝶
天吳蝸像潛其形

題閔農圖

自夏徂秋三月不雨七月中澣蘿軒先生至茂苑
寫閔農圖以識途中所見并題五言古體詩十韻
昨招飲出圖屬題依韻敬和

今年余出都所至皆亢旱地主以旱辭腰纏無一貫但

念災黎悲敢爲空囊歎請命不上聞報荒其所憚江左
亦復然大河曬成岸田夫踏水車力瘁婦女換正供急
追呼畏吏或逃竄先生手寫圖晨夕自把玩上官若見
之定出浹背汗我有閔農心奮髯怒抵案

十月中蘿軒先生復至茂苑又題五古一首於

閔農圖後并和請正

民以食爲天天心乃如此東南俗不淳年熟頗華侈驕
陽數月餘掘地無勺水我謂官與民原如臂指使痛癢
不相關但知出乎爾南面染脂膏何曾識耒耜補救不
以時悔之已晚矣轍中魚欲枯寧可歲月俟引領望有
司誰能惜時否

至南園觀五人墓雜劇得五百字

吳縣周吏部棄官還其鄉魚口焰頗熾刑餘勢方張東
林半誅僂手滑如屠羊生祠遍天下普惠建金閭高鋪
翡翠瓦巧刻玳瑁梁衣冠儼人主傀儡雕沈香璀璨九
龍輦莊嚴七寶牀齊呼九千歲拜跪擬朝綱吏部著白
服扁舟到山塘乾坤有正氣極口詈豺狼逆黨噤不語
以之報貂璫書生何敢爾矯旨逮忠良緹騎奉駕帖叫
囂類風狂吏部色不變揚揚如平常妻子環公哭鄰里
皆惋傷問有家事否且住通商量吏部啞然笑却立意
徬徨龍樹有釋子求書顏堂皇三字小雲棲筆法何端
莊岸然振衣起不復入後房吳人憤且怒痛哭訴穹蒼

縣解宿三日宣詔列桁楊是時丙寅歲三月方春陽風
雨結冤氣天地昏無光願爲吏部死三代直道彰城上
城下滿香蕪煙蒼黃正衙設御案緹騎紛軍裝右立徐
巡按左立毛都堂士乃四民首致詞聲琅琅端容責撫
按相顧心驚惶日昃不得渡往復徒周章大呼囚安在
緹騎手銀鐙誰逆上公者若輩宜誅戕謂是天子詔天
威自肅將忠賢灑掃役凶豎敢披猖攀檻復折楯旨裂
緹騎僵官長悉迸走衆怒不可當吏部竟就逮頭以三
木囊對簿惟嫚罵笞箠滿身瘡片紙付獄吏忠魂慘罹
殃中丞說民變助逆何肺腸一城幾流血天意終慈祥
嗚呼百萬命以此五人償慷慨赴西市意氣逾激昂囚
碑樹萬古姓字芳五人名不朽明祚遂以亡

芋城過訪慨歎人情因作長歌以紓不平之氣
人情平地生驚瀾變刃百出無心肝意在東南言西北
晝爲酷暑宵嚴寒葭草之親性命友一錢得失開爭端
握手慷慨許君死下石誰念平生歡初交不過半面識
揖讓談諧自修飾遊戲徵逐酒食間那知胸中有柴棘
是非顛倒隨其心鼓舌欲變白爲黑忽離忽合忽恩讐
閃爍譁張如鬼蜮君不覩翟公拒客書門云生死貴賤
交情分又不見劉峻曾廣絕交論凶終隙末有餘恨

生朝感賦

偶然客人間歲子月建丑識常在幾先事不落人後能
食三斗葱可飲一石酒結交游俠兒買笑當鑪婦跳盪
隨所如縱橫無不有振顏義薄雲發憤氣貫斗閒爲鸞
鳳吟怒作蛟龍吼神威力拔山絕技射穿柳風雷指顧
間勳業反覆手珥筆三殿趨笞兵萬里走文章名可傳
竹帛功不朽燒丹鼎未開抱璞石誰剖艱難人事紛懽
悴吾衰久鯨鯢屈蹄泔松柏困培塿把臂寡論心捉衿
或見肘身與木石居跡同麋鹿友不能測世情那得調
衆口避喧眼倦開造句心欲嘔老子談虛無步兵絕塵
垢道德五千言詠懷十七首索居書半牀陋巷宮一畝

氣槩雖摧顏精神尚抖擻息機每坐忘安分但株守狎
鷗海上翁賭棋橘中叟頗厭冠履勞未嫌邨野醜此屈
應彼伸逆來自順受蟻穴說恩讐蝸角爭勝負大道猶
醞雞萬物是芻狗空相笑革囊委形學土偶死生亦大
矣舜跖今在否百年今已半十事漸忘九散木雖不材
樂生保其壽

大雪和東坡雪後書北堂壁二首韻

晚來作冷雨廉纖雪意霏霏入夜嚴湖水平鋪蘆絮被
郊原亂撒水晶鹽玉花碎片凝枯樹冰筋長條挂短檐
獨起披裘登閣坐朝陽半角遠山尖

饑飛林外噪晨鴉口欲流涎想麴車翠竹未翻千个影

紅梅初吐一枝花
騁辭簡授梁園客
僵卧寒生處
士家不是灞橋驢
背上爲吟喜雪手
頻義

示無著三弟再和陶癸卯十二月中作與從弟敬遠

窮居息交游
久與塵事絕
陋巷聞無人
嚴寒氣不閉
剝啄吾弟來
侵晨蹋殘雪
相對坐蕭齋
埽除頗清潔
脫粟一飯留
自慚無佳設
出處自斟量
悵惘心不悅
所貴不朽名
旂常著功烈
萬類賴鈞陶
丈夫重氣節
雌伏殊自傷
埋頭守懶拙
銅臭與書香
誠哉區以別

示雙白姪再和東坡贈安節韻

扁舟阿咸來
相對語移日
應門無小童
所居僅容膝
時

和東坡詩偶示維摩疾撫掌鬼笑人
安能營什一并不樂琴書蕭然徒
四壁呼燈酒三行
酬酢惟叔姪自給學
杜陵負薪采橡栗
過眼任煙雲賞心在泉石
余將五嶽遊寧俟嫁娶畢
去去勿復言傷懷淚空滴

楊進士查岑過訪和東坡喜劉景文至韻

門前剝啄何人呼
舉頭雪影彌天隅
雀可張羅蛛結網
詩人酒伴經時無
握手大喜傾家釀
翦菘擇菜尋園夫
年來潦倒不可說
顛仆誰肯相持扶
狂奴故態仍爾爾
裂眚豎髮張髭鬚
毀方爲圓非所好
以此入世真癡迂
形影相弔聞見絕
如蟲僵蟄難昭蘇
壯心不已猶烈士
老女未嫁非名姝
髀肉復生筋力瘁
車塵馬跡空支吾

一瓢一笠君莫笑我願汗漫遊江湖

林大令鳳溪招同楊進士查岑姚孝廉心求觀
劇鳳溪出二扇索詠

贈陸郎

竹脆絲清夜正長紅瓊條脫綠雲裳越吟亦似吳歛好
色藝於今獨擅場

星冠鶴氅立屏前結束風流體態妍勸客更歌將進酒
看儂試演小遊仙

短袍窄袖佩吳鉤百鳥裙拖兩鳳頭小隊排齊高處坐
烏雲斜挽著兜鍪

斗轉鐘催客未歸爐煙縹緲護重幃酒闌更作前溪舞

五色雲從掌上飛

贈高郎

睂彎腰細可憐生花貌緘愁畫不成最惜綠尊紅燭下
衆中未敢語分明

眼如點漆面凝脂象板檀槽度曲時自向瓊筵聽子夜
好將紅豆記相思

碧闌干外月黃昏唱到離詞淚有痕玉筋兩行垂素面
者回真箇要消魂

皓齒明眸洛水神凌波小步襪生塵座中我亦知音者
不獨微之惜采春

和右水

歲暮鄉俗東坡詩寸陰可惜年將辭求魚自恨向乾谷
不羨高材與疾足思之爛熟輕微官寧居寂寞愁饑寒
如今所重非經術雖有堯舜誰稷契桐焦爨下無憐
才萬卷經籍成灰埃頭童齒豁已如此當時人說佳公
子

和東坡記歲暮鄉俗三首韻

餽歲

一歲情恻然遂以微物佐餽遺頗尋常未有難得貨交
無論親疎戶不分小大剥啄致盤餐驚起袁安卧挈榼
奴子勞終日不得坐此往彼復來紛紛如旋磨脫或忘
一家反脣相督過僑寓無親朋新詩自賡和

別歲

羲馭無停晷為歡不可遲歲聿云暮矣去日安能追離
家百里許如隔天一涯密友互主客興會欣良時張羅
山雉美垂釣河魚肥且為卒歲樂勿作窮年悲消愁但
一醉難與卮酒辭五十未為老肯云筋力衰

守歲

至道無為者存身蟄龍蛇

易繫辭龍蛇之蟄以存身也淮南子至道無為一龍一蛇

異地欣此

夕相邀話周遮餞年不以酒如此良夜何舉觴飲無算
四坐笑語譁兒童燒爆竹不聽街鼓擗啓明星欲起漸
見晨光斜景物與年換豪氣無蹉跎鉛刀堪一割我言
非矜誇

江鄉羈旅集卷一
辛丑除夕寄無亢兄和子由辛丑除夕寄子瞻

韻

明日是明年今宵真可惜到此六月餘無以謀朝夕斗
室芥子如僅足布一席目中見要人大半成枯腊天機
更放狂興不減宿昔怕蹋軟紅塵名心已冰釋粗豪好
罵人往往有酒失貴賤不我交門前無雜客有時拊膺
呼鬚似蝟毛磔迴首故園荒兔葵與燕麥卜居笑屈原
何必問龜坼猶得食肉糜不至厭糠覈願作太古民懶
通承明籍著作藏名山聞譽未熏灸游泳避網羅飛騫
遠彈射縱無粟萬鐘寧損軀七尺一哂翰墨場誰爲文
章伯辛苦讀父書簡編耀縹碧歲盡風雨淒援戈難麾

日丈夫處貧窮枯項復黃馘南北天一涯與君千里隔
同氣久乖離流年歎梭擲

讀書堂江鄉羈旅集卷一

